

Reclama per Laax sin donn e cust da «paupers Turitgais»

CUN DANIEL KRIEG HA DISCURRÌ
CLAUDIA CADRUVI / ANR

■ **Tge pensan quels che fan reclamas? Co vegnan els sin ideas spectacularas? L'anr ha dumandà Daniel Krieg. El e sia agentura han fatg la reclama «Südanflug ja» che ha vilentà sin il sorisum insaquants Turitgais.** Tema numer in a Turitg èn ils corridors aviatics. La glied che abitescha sut il nov corridor dal sid fa gronda opposiziun cunter la canera d'aviuns. Il comité sid ha creà ils placats: «Flugschneise Süd Nein». A Turitg enconuscha mintgin quest placat mellen. L'agentura «Krieg, Schlupp, Springer & Jacoby» ha midà giu il placat per far reclama per vacanzas da snowboard a Laax. L'aviun che sgola sur la scrittira naira ha l'agentura remplazzà cun in snowboardist. Il nov motto sa cloma «Für uneingeschränkten Flugverkehr über Laax».

Pertge na faschais Vos betg reclama cun bels culms grischuns?

Daniel Krieg: En Germania fissi giustifigà da mussar maletgs da culms. Ad in Giapunais ston ins p. ex. mussar il Matterhorn per far reclama per la Svizra. Ma daco duessan nus mussar culms en Svizra, nua che mintgin sa ch'ils culms grischuns èn bellezza. Laax è fitg innovativ. Ils giuivens vegnan perquai ch'igl è trendic. Perquai na dastga Laax betg far reclama lungurusa.

Tge glied lais Vos pledentat?

Laax ha la pli enconuschenta scola da snowboard per il publicum «selvadi». Nus pledentain ils fitg giuivens. Els ston chattar cool nossa reclama. Ils papis e



las mamis ston era chapir il cuntegn ed esser d'accord. Els pajan gea las vacanzas.

Per il parc da snowboard a Laax lain nus gudagnar ils freestylers. Igl è giuivens che taidlan heavy-metal, hip hop, che fan chaussas crassas, che giogan playstation, che van en il Mac Donalds e sa dattan tuttina ora sco vegetarianers. Uschia èn ils giuivens. Per gudagnar els na poss jau betg vegnir cun bugliarsa vedra.

Nus stuain esser frechs e divertents. Nus stuain esser uschia sco ina banca na sa preschentass mai. Quai na munta betg ch'igl è fallà, quai che la banca fa.

Nus avain simplamain en mira total aurtura glied.

E co essas vegnì sin l'idea da duvrar il placat «Flugschneise Süd Nein»?

Quai è il sulet ch'ins na po betg declerar. U ch'ins ha ideas u ch'ins n'ha naginas.

La reclama vain nus fatg per freestyle.ch – in event che ha mintgamaì lieu il settember cun 100 000 giuivens sin la Landiwiese cun freestyle, motocross, skateboard etc. L'intschess principal per Laax è sa cha-

pescha Turitg. Perquai ha Laax fatg in stan durant il freestyle.ch. Il stan aveva ina tur melna cun si il logo «Flugschneise Süd Ja». I ha era dà t-shirts, ballons e fepls sgulants cun il logo. Laax ha vulì dir als giuivens: «Hallo, vegni tar nus, a Laax.»

Ma pudais Vos anc sa regurdar cura che l'idea sco tala è vegnida?

Nus eran en trais. Nus avain discurrì da la reclama dal 2004 e 2005 per il parc da snowboard. Igl è stà ina sort brainstorming. Ils chavazzins eran snowboard, Turitg, Laax, sgular. Insatgi è vegnì cun il placat original dals «Südschneislers». En quel mument hai fatg clic, e nus avain gi' ils cuntegns entaifer paucas secundas. Il traffic aviatic è ina tematica uschè populara a Turitg. Ed igl è fitg simpel: Ils aviuns a Turitg na duessan betg sgular perquai ch'els fan ina caneruna. Ils snowboarders a Laax dastgan dentant sgular e na fan nagina canera. Igl è stà nagina «illuminaziun divina», talas ideas vegnan be cun lavurar.

Essas Vos cuntent cun la reclama?

Gea fitg. Laax dal reminent era.

E las reclamaziuns?

En la «Südosstschweiz» è cumparì in artrittel «Witzige Bündner ärgern Zürcher». L'entir Grischun, che ri uschè gudent sur dals Turitgais, ha ris da schluppar. Quai è bel. Jau hai gi' ina massa feedbacks, era e-mails da glied che viva en il corridor sid. Igl è be paucs che han sa lamentà. Bunamain tut la glied ha chapì la

reclama uschia sco ella è stada manegiada. In zitg provocanta e legra, ma betg provocativa. Jau hai suenter anc ina giada ponderà, sch'i savess dar glied che sa senta blessada u attatgada entras questa reclama. Ma jau sun vegnì a la conclusiun: Ins sto vulair chapir fallà, per chapir fallà.

Smanatschas da boicot

L'agentura da reclama «Krieg, Schlupp, Springer & Jacoby» ha creà la reclama «Südanflug Ja» per la gruppa Arena Alva. Intgins exponents che lavuran cunter il corridor aviatic dal sid èn sa gritten-tads. Els han crititgà che l'Arena Alva fetschia maldiever da glied che piteschia da la canera a Turitg. Ins ha schizunt smanatschà cun boicots da vacanzas a Laax. Ils chaus chalirads èn dentant gia sa calmads. Entras la protesta dal «comité sid» è la reclama vegnida derasada anc pli lunsch enturn en las gasettas che han rapportà sur-lunder.

Andreas Bärtsch, responsabel da marketing da l'Arena Alva, di ch'el na haja betg quintà cun questa polemica. I na saja mai stà la finamira da far politica ed ins haja chapientscha per quels che sajan pertutgads da la canera. Bärtsch di era che quests slogans sajan vegnids fatgs be per l'event freestyle.ch. L'autra reclama per quest enviern vegnia fatga cun auters cuntegns.